



## KOMUNIKADU IMPRENSA

### **CNC I.P Organiza Seminariu Nasionál Kona-ba Rekonsiliaun Konfliktu Política Interna Ho Tema “Dalan ba Hakotu Siklu Odio no Vingansa Jerasionál”**

Díli – (05 Juñu 2025), Centro Nacional Chega! Instituto Publiku (CNC I.P) organiza seminariu nasionál ne’ebé ko’alia kona-ba Rekonsiliaun Konfliktu Política Interna ho tema “Dalan ba Hakotu Siklu Odio no Vingansa Jerasionál”, ne’ebé realiza iha Salaun Konferensia Centro Chega! I.P, Antigo Comarca Balide.

Objetivu husi seminariu ne’e mak, nu’udar espasu ba diskusaun sobre asuntu rekonsiliaun ne’ebé foku ba konfliktu interna entre Timoroan. Atu promove prosesu no materializa rekomendasaun Chega! no PMAS relasiona ho asuntu rekonsiliaun nian. Atu buka mekanismu alternativa sira kona-ba prosesu rekonsiliaun ne’ebé mak dura no justu. Atu hasa’e ema nia konsiênsia kona-ba importansia husi rekonsiliaun ba dezvoltamentu nasionál;

Seminariu ne’e realiza atu hetan ba mandatu Centro Chega! I.P nian mak atu monitoriza no implementa rekomendasaun Chega!, kontinua hala’o atividade diálogo no rekonsiliaun atu nune’e, neneik no bebeik ita kura ema nia kanek inklui hakotu siklu odiu no vingansa entre Timoroan.

Konfliktu interna entre Timoroan, invazaun no okupasaun ilegal Indonézia durante periodu Dezembru 1975- Outubru 1999, haklean no habelar liu-tan divizionismu entre Timoroan sira tanba opsaun politika mak iha. Diverzênsia politika sira ne’e rezulta mos violasaun direitus umanus barak mak akontese. Relatóriu Chega! no relatóriu Per Memoriam Ad Spem, konklui katak, durante tinan 25 nia laran, militar, polisia no autoridade sivil Indonézia nian komete krimi kontra umanidade hasoru Timoroan sira.

Iha relatoriu rua ne’e mos hatete katak partidu politiku timoroan no mos rezistênsia armada Timor nian komete mos violasaun direitus umanus hasoru timoroan sira seluk. Relatóriu Chega! relata katak, numeru ema mate no lakon iha periodu konfliktu interna provolta ema nain 1500-3000 (Chega – Volume II, part 72: *Unlawful killings and Force disappearances*). Relatoriu Chega! mos nota katak durante periodu rezistênsia nian, husi tinan 1976 to’o 1983, mudansa idiolojia no estratejia rezistênsia nian rezulta mos ba hamosu violasaun direitus umanus oioin ne’ebé husik hela kanek no fitar, inklui lori sofrimentu naruk ba vítima sira no familia vítima sira.

Iha tinan ida ne’e, Timor-Leste sei celebra tinan 50 proklamasun independensia unilateralmente ne’ebé Fretilin proklama iha 28 Novembru 1975 hodi harii Republika Demokratiku Timor-Leste (RDTL). Hahu kedas iha inisiu tinan 1975, Timoroan sira halibur

malu iha asosiasaun politika sira hanesan UDT, ASDT/Fretilin, APODETI, KOTA no Trabalhista. Estabelesementu asosiasaun politika no ikus mai nakfilak nudar partidu politiku ne'e, nudar mudansa signifikante hafoin tinan 450 Timoroan sira moris iha kolonialismu Portuges nia ukun. Diverjensia vizaun politika entre partidu sira ne'e hodi ba hamosu divizaun iha sosiedade timoroan ne'ebé nia rohan mak hamosu konfliktu interna entre partidu politiku sira iha Agostu 1975 no rezulta mos ba invazaun Indonézia nian mai RDTL iha 7 Dezembru 1975.

- Remata -

**Ba informasaun liu tan kontaktu:**

Raimundo Sarmento Fraga  
Ofisiál Média no Komunikasaun  
Email: [rsfraga@centrochega.gov.tl](mailto:rsfraga@centrochega.gov.tl)  
Nú. kontaktu: 7874 0345

---

Boilerplate

**Centro Nacional Chega!!I.P.**, *Da Memória à Esperança* (Centro Chega! I.P) hamri'ik nu'udar institutu públiku ida ne'ebé estabelese ho deketu Lei nº. 48/2016. Centro Chega!!I.P nia vizaun mak: "Sosiedade ida ne'ebé inkluzivu, la repete istória pasadu nian, moris iha dame, no respeitu ba direitus umanu". Nia misaun mak: "Harii sentru Pós-konfliktu ne'ebé prezerva memória pasadu nian hodi promove direitus no valór umanu, harii parseria nasional no internasionál hodi reforsa rede servisu sira ba implementasaun rekomendasaun sira husi Relatório Final *Comissão de Acolhimento, Verdade e Reconciliação* (CAVR)-Chega! no *Comissão da Verdade e Amizade* (CVA) - *Per Memoriam Ad Spem*, sira ne'ebé relevante".